

sô mugen wol die besten sîn,
die ich in der werlte hân erkant.
kan ich rechte schouwen
guot gelâz unt lîp,
sem mir got, sô swüere ich wol daz hie diu wîp
bezzer sint danne ander frouwen.

Tiusche man sint wol gezogen,
rechte als engel sint diu wîp getân.
swer si schildet, derst betrogen:
ich enkan sîn anders niht verstân.
tugent und reine minne,
swer die suochen wil,
der sol komen in unser lant: da ist wünne vil;
lange müeze ich leben dar inne!

Der ich vil gedienet hân
und iemer mère gerne dienen wil,
diust von mir vil unerlân:
iedoch sô tuot si leides mir sô vil.
si kan mir versären
herze und den muot.

nû vergebez ir got dazs an mir missetuot.
her nâch mac si sîchs bekêren.

Minne diu hât einen site:
daz si den vermîden wolde!
daz gezæme ir baz.
dâ beswært si manegen mite,
den si niht beswæren solde:
wê wie zimt ir daz?
ir sint vier unt zwênzec jâr
vil lieber danne ir vierzec sint,
und stellest sich vil übel, sihts iender grâwez hâr.

Minne was mîn frowe sô gar,
deich wol wiste al ir tougen:
nu ist mir sô geschehen,
kumt ein junger ieze dar,
sô wird ich mit twerhen ougen
schilhend an gesehen.
armez wîp, wes müet si sich?